

Ո Ր Ո Շ ՈՒ Մ N 176 /6
/Ճանապարհային վճարների գանձման վերաբերյալ/

«20» հունիսի 2019թ.

ք. Վանաձոր

Հայաստանի Հանրապետության պետական եկամուտների կոմիտեի Արևելյան մաքսատուն-վարչության պետ Գարիկ Դարբինյանս, քննելով Ռոբերտ Վոլոդյայի Անանյանի /քաղաքացիությունը Ռուսաստանի Դաշնության, անձն. 750630860, հասցեն՝ ՀՀ ք. Երևան, Ոսկերիչների 1/ նկատմամբ հարուցված վարչական իրավախախտումների վերաբերյալ գործը,

Պ Ա Ր Զ Ե Ց Ի

Ռ-Դ քաղաքացի Ռոբերտ Վոլոդյայի Անանյանը 2015թ. ապրիլի 15-ին թիվ F23235 մաքսային հայտարարագրով «Ժամանակավոր ներմուծում» մաքսային ռեժիմով մինչև 15.05.2015թ. ՀՀ է ներմուծել 2005 թվականի արտադրության «AUDI A8L» մակնիշի, O555AH177 հաշվառման համարանիշի ավտոմեքենա, սակայն սահմանված ժամկետում չի կատարել ավտոմեքենայի հետագա արտահանման պարտավորությունը:

Ռոբերտ Անանյանը 15.05.2019թ. դիմումով հայտնել է, որ աշխատելով Ռ-Դ ք. Մոսկվա «Յուվեստ Արտադրական Ընկերություն» ՍՊԸ-ում 2013թ. հոկտեմբեր ամսին գործուղվել է ՀՀ, ք.Երևանում գտնվող «Մերիդիան հոլդինգ» ՓԲԸ, որը հանդիսանում է «Յուվեստ Արտադրական Ընկերություն» ՍՊԸ-ի սեփականությունը, իր հետ բերելով նաև նույն ՍՊԸ-ին պատկանող թեթև մարդատար ավտոմեքենա մակնիշը AUDI A8L, համարանիշը՝ O555AH177, vin կոդ՝ WAUZZZ4E56N008501 համաձայն 2013թ. հոկտեմբերի 9-ին տրված N 77AB1184928 լիազորագրի, որը ՀՀ տարածք է մուտք գործել Բագրատաշենի մաքսային անցակետով: Նշվել է նաև որ մեքենան բազմիցս մուտք է գործել ՀՀ և 2015թ.-ից գտնվում է ՀՀ տարածքում իր պատասխանատվության ներքո և կայանված էր «Մերիդիան հոլդինգ» ՓԲԸ ընկերության տարածքում: Հաշվի առնելով այն հանագամանքը, որ պատրաստվում է մեքենան վերադարձնել Ռ-Դ և հանձնել «Յուվեստ Արտադրական Ընկերություն» ՍՊԸ-ին, խնդրում է պարզաբանել թե AUDI A8L մակնիշի, O555AH177 համարանիշի տրանսպորտային միջոցի նկատմամբ ինչպիսի հարկային և մաքսային

պարտավորություններ են առաջացել, որպեսզի կարողանա կատարել համապատասխան վճարումները:

Ղեկավարվելով «Վարչարարության հիմունքների և վարչական վարույթի մասին» և «Ճանապարհային վճարի մասին» Հայաստանի Հանրապետության օրենքների դրույթներով, Ռոբերտ Անանյանի կողմից 2015 թվականի մայիսի 15-ից մինչև 2018թ. հունվարի 1-ը ընկած ժամանակահատվածի համար ճանապարհային վճարի չվճարման փաստի առթիվ հարուցվել է վարչական վարույթ:

Նշանակվել է գործի քննություն 07.06.2019թ. ժամը 16:00-ին, վերջինս պատշաճ ծանուցվել է գործերին առընչվող դիմումի մեջ նշված հասցեով:

Վարչական վարույթի շրջանակներում 06.06.2019թ. թիվ Ն/22-4/59321-2019 գրությամբ կատարվել է հարցում ՀՀ ՊԵԿ Եկամուտների հաշվառման վարչություն՝ ՌԴ քաղաքացի Ռոբերտ Անանյանի կողմից (անձնագիր՝ թիվ 750630860) 2015թ. հոկտեմբեր ամսին /TWM ծրագրով լրացված՝ F23235 հայտարարագիր/ ՀՀ ներմուծված Audi A8L տրանսպորտային միջոցի վերաբերյալ տեղեկատվություն ստանալու նպատակով:

Գործի քննությունը տեղափոխվում և նշանակվում է 20.06.2019թ., ժամը 16:00-ին քանի չէր ստացվել կատարված հարցման պատասխանը, վերջինս պատշաճ ծանուցվում է, սակայն չի ներկայանում գործի քննությանը:

Ռոբերտ Վոլոդյայի Անանյանի նկատմամբ հարուցված մաքսային կանոնների խախտման վերաբերյալ գործը ՀՀ ՄՕ 219-րդ հ. 2-րդ մասի համաձայն քննվել է նրա բացակայությամբ:

Ի պատասխան 12.06.2019թ. թիվ Ն/22-4/62716 զեկուցագրով արված հարցման, ՀՀ ՊԵԿ Արևելյան մաքսատուն-վարչության կողմից ներկայացված 18.06.2019թ. թիվ Ն/22-1/65834-2019 գրությամբ հայտնվել է, որ ըստ Ձեր կողմից նշված տվյալների, Ռոբերտ Անանյանի կողմից ներմուծված տրանսպորտային միջոցի համար վճարման ենթակա ճանապարհային վճարը կազմում է 640000 դրամ, իսկ հաշվարկված տույժի գումարը կազմում է 350400 դրամ:

Իրավահարաբերության ծագման պահին գործող «Ճանապարհային վճարի մասին» ՀՀ օրենքի 4-րդ հոդվածի համաձայն՝ ճանապարհային վճարի տեսակ է համարվում այլ պետություններում գրացված տրանսպորտային միջոցներով ավտոմոբիլային

ճանապարհներից օգտվելու համար վճար: Օրենքի 5-րդ հոդվածի համաձայն՝ այլ պետություններում գրանցված տրանսպորտային միջոցներով ավտոմոբիլային ժանապարհներից օգտվելու համար վճարը յուրաքանչյուր մուտքի համար գանձվում է հետևյալ տասնհինգօրյա դրույքաչափերով՝ Թեթև մարդատար (մինչև 7 նստատեղով) ավտոմեքենաների համար՝ 10000դրամ: Օրենքի 9-րդ հոդվածով սահմանում է այլ պետություններում գրանցված տրանսպորտային միջոցներով ավտոմոբիլային ճանապարհներից օգտվելու համար վճարի հաշվարկման և վճարման կարգը: Նշված հոդվածի 1-ին մասի համաձայն՝ այլ պետություններում գրանցված տրանսպորտային միջոցներով ավտոմոբիլային ճանապարհներից օգտվելու համար վճարը հաշվարկվում է սույն օրենքին համապատասխան և պետական բյուջե է մուծվում այդ տրանսպորտային միջոցները Հայաստանի Հանրապետության տարածք մուտք գործելիս՝ բացառությամբ սույն հոդվածի 3-րդ կետում նշված դեպքի, երբ Հայաստանի Հանրապետության տարածքում տասնհինգից ավելի օր գտնվելու դեպքում յուրաքանչյուր հաջորդ տասնհինգ օրվա կամ ավելի պակաս ժամկետի համար այլ պետություններում գրանցված տրանսպորտային միջոցներով ավտոմոբիլային ճանապարհներից օգտվելու համար վճարը հաշվարկվում և պետական բյուջե է մուծվում Հայաստանի Հանրապետության տարածքում գտնվելու ժամկետը լրանալուց հետո՝ հինգ օրվա ընթացքում: Օրենքի 12-րդ հոդվածով սահմանվել են ճանապարհային վճարի վճարման ժամկետները: Նշված հոդվածի 1-ին մասի համաձայն՝ այլ պետություններում գրանցված տրանսպորտային միջոցներով ավտոմոբիլային ճանապարհներից օգտվելու համար վճարը վճարվում է դրանցով Հայաստանի Հանրապետության տարածք մուտք գործելիս:

Եթե այդ տրանսպորտային միջոցները Հայաստանի Հանրապետությունում գտնվում են տասնհինգ օրից ավելի, ապա դրանցով ավտոմոբիլային ճանապարհներից օգտվելու յուրաքանչյուր լրացուցիչ տասնհինգ օրվա (կամ ավելի պակաս ժամկետի) համար կատարվում է նոր վճարում՝ սույն օրենքի 5 հոդվածով սահմանված դրույքաչափերով: Օրենքի 20-րդ հոդվածի համաձայն՝ սույն օրենքի խախտումն առաջացնում է Հայաստանի Հանրապետության օրենսդրությամբ սահմանված պատասխանատվություն իսկ վճարի վճարումն ուշացնելու համար վճար վճարողներից գանձվում է տույժ:

Այսպիսով, վարույթի նյութերով հիմնավորվում է, որ Ռոբերտ Վոլոդյայի Անանյանի կողմից ներմուծված տրանսպորտային միջոցի համար 2015 թվականի մայիսի 15-ից մինչև 2018թ. հունվարի 1-ը ընկած ժամանակահատվածի համար հաշվարկվել է 640000 դրամ ճանապարհային վճար և 350400 դրամ տույժ:

Ելնելով վերոգրյալից և ղեկավարվելով «Ճանապարհային վճարների մասին» ՀՀ օրենքի 5-րդ և 20-րդ հոդվածներով, «Վարչարարության հիմունքների և վարչական վարույթի մասին» ՀՀ օրենքի 53-րդ և 58-րդ հոդվածներով՝

Ո Ր Ո Շ Ե Ց Ի

1. Ռոբերտ Վոլոդյայի Անանյանից հօգուտ պետբյուջե գանձել 990400 դրամ, որից 640000 դրամ, որպես վճարման ենթակա ճանապարհային վճարի գումար, իսկ 350400 դրամը՝ ճանապարհային վճարի նկատմամբ հաշվարկված տույժի գումար:
2. Որոշման մասին օրենքով սահմանված կարգով տեղյակ պահել Ռոբերտ Վոլոդյայի Անանյանին:

Սույն որոշումն ուժի մեջ է մտնում դրա ընդունման մասին իրազեկելուն հաջորդող օրը և «Վարչարարության հիմունքների և վարչական վարույթի մասին» ՀՀ օրենքի 10-րդ գլխի նորմերին համապատասխան կարող է երկամսյա ժամկետում բողոքարկվել վերադասության կարգով կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշումը կամավոր չկատարվելու դեպքում այն կկատարվի «Դատական ակտերի հարկադիր կատարման ծառայության» միջոցով՝ պարտապանի հաշվին:

Սույն որոշմամբ նշանակված փուլանքի վճարման հաշվեհամարներն են. 900005027033 (ՀՀ պետական բյուջե, կենտրոնական գանձապետարան, Արեվելյան մարսավորուն-վարչություն, ԿՈԴ 29):

ԱՐԵՎԵԼՅԱՆ ՄԱՔՍԱՏՈՒՆ-

ՎԱՐՉՈՒԹՅԱՆ ՊԵՏ



Գ. ԴԱՐԲԻՆՅԱՆ